

# Stgaffir potenzial nua ch'el nun exista

Regiuns cun pauc potenzial duessan vegnir activas

■ (anr/fa) Cun agid da duas regiuns pilot vul il chantun examinar las enconuschientschas dal studi davart regiuns cun pauc potenzial. La pbd ha la schà vegnir a pled als auturs dal studi.

Regiuns cun pauc potenzial duessan vegnir depopuladas, ch'i na rendia betg da las mantegnair: Las pretaisas da l'Avenir Suisse avevan spaventà ils abitants da las regiuns muntagnardas. Era il studi «Regiuns cun pauc potenzial» ha sveglià en Grischun emoziuns. Perquai ha envidà la pbd grischuna glindesdi saira ad in'occurrentza d'infurmaziun a La Punt/Reichenau: «Nossa finamira era da survegnir explicaziuns fundadas per mussar ch'i dat pussaivladads da svilup era per las regiuns cun apparentamain pauc potenzial», ha ditg *Marcus Hasler*, il president da la pbd grischuna. *Guido Cavelti* e *Christian Flury*, co-auturs dal studi, han dà ina survista da quel.

## Definaziun da las regiuns cun pauc potenzial

Sco che Flury ha explitgà sa basa il studi sin la nova politica regiunala da la confederaziun. Cun il studi han ins cumenzà d'atun 2005. Era il chantun Uri ha la schà far in studi sumegliant. En l'emprima fasa s'han occupads ils perits da las duas dumondas: Tge èn regiuns senza potenzial e nua sa chattan ellas? «Ils indicaturs per regiuns cun pauc potenzial èn la structura da la vegliadetgna da la populaziun (bleras persunas attempadas, paucs uffants), las plazzas da lavur existents, l'access e la forza finanziaria da las singulas regiuns sco era il provediment general (medi, scola, posta, butia, ustaria etc.). Regiuns rumantschas sco il Grischun central, l'Engiadina Bassa e la Val



Ils dus co-auturs Guido Cavelti e Christian Flury (sa san.) cun il studi davart las regiuns cun pauc potenzial.

FOTO F. ANDRY

Müstair, la Surselva e la Muntogna da Schons appartegnan era tar las regiuns pli flaiavas. Ussa ha cumenzà la segunda fasa, durant la quala ins emprova da chattar soluziuns per meglierar il potenzial.

## «Basegn da persunas che s'engaschan»

«Pauc potenzial na vul betg dir nagin potenzial», ha punctuà Guido Cavelti,

«cuntradas naturalas e culturalas, autenticità ed infrastruttura spectaculara sco punts e vias alpinas han grond potenzial.» Ch'i dovria per trair a niz quests potenzials dentant persunas iniziativas che ageschan da maniera coordinada, ha'l menziunà. Ina pussaivladad che ha era in effect fritgaivel è sco ch'el ha ditg da stgaffir novs potenzials, «p.ex. crear specialitads ch'ins po exportar, sco il Bun

Tschlin, declarer ina vallada entira sco il Scanvetg sco regiun per abitar u stgaffir in territori protet sco la Biosfera Val Müstair.»

## Naginas zonas da dazi liber

*Eugen Arpagaus*, il manader da l'Uffizi chantunal per economia e turissem (UET), ha infurmà ch'il chantun Gri-

schun sustegna las bregias per chattar strategias per promover las schanzas da svilup. «La lescha davart il svilup economic pussibilitescha d'agir da maniera coordinada», ha'l cuntinuà, «l'UET è pront da sustegnair projects per promover il svilup.» El ha menziunà era tge ch'i n'è betg previs per cuntanscher quella finamira: Ch'ins na veglia betg stgaffir novs zonas da dazi liber, e ner betg relaschar als abitants da regiuns cun pauc potenzial la taglia chantunala, federala u quella sin la plivalur. «Per las regiuns pli debblas na datti ner naginas excepziuns tar las leschas da planisaziun dal territori e da la protecziun da l'ambient», ha ditg Arpagaus.

## Trachsel: «Far nagut fiss desastrus»

Ch'il Grischun saja, auter ch'il Tessin u grondas regiuns en Italia e Frantscha, sin pli u main l'entira surfatscha colonisà e cultivà, ha ditg cusseglier guvernativ *Hansjörg Trachsel*, «sch' ils pèrs en quellas vals han per media mo 1,2 uffants vegn la populaziun da questas regiuns però a sa diminuir, per evitar quai ston las regiuns stgaffir structuras, plazzas da lavur e daventar uschia pli attractivas per novs abitants.» El ha intimà a las regiuns da daventar activas, far nagut fiss tenor el da sustegnair il process regressiv dal dumber d'abitants en las regiuns cun pauc potenzial. Il cusseglier guvernativ ha appellà a questas regiuns da s'annunziar tar ses departement: «Per examinar las enconuschientschas teoreticas dal studi e per giuditgar la situaziun tshertgoin nus dus regiuns pilot cun persunas ch'èn prontas da s'engaschar per in avegnir prosperaivel da lur regiuns», ha ditg Hansjörg Trachsel.